

Intervju: Pedi Ešdaun, visoki predstavnik: "Sramotno je i skandalozno misliti samo na sebe"

Ešdaunova poruka parlamentarcima Bosne i Hercegovine

Parlamentarci se nadaju da će imati deset puta veću penziju od prosječne u FBiH i da bi mogli ići u penziju nakon samo 20 godina službe. To je sramotno

Sramotnom i skandaloznom visoki predstavnik Pedi Ešdaun nazvao je inicijativu parlamentaraca Bosne i Hercegovine, kojom bi se donošenjem zakona o njihovim pravima i obavezama legalizirale mnogobrojne i besramne privilegije.

"Svaka osoba u BiH bi bila zaprepaštena i bijesna ukoliko bi takav zakon bio donesen u Parlamentu. Takva je ideja došla ubrzo nakon nedavnog povećanja plaća parlamentarcima. I sad će oni nadaju da će, ukoliko zakon o njihovim pravima i obavezama bude donesen, imati deset puta veću penziju od prosječne u Federaciji i da bi mogli ići u penziju nakon samo 20 godina službe. To je sramotno. Parlamentarci bi trebali raspravljati kako da poboljšaju život svojih građana, a ne samo da rade samo za sebe", kazao je za Oslobođenje u četvrtak Ešdaun.

Izražavajući dilemu da li je uopće potrebno da on reagira na ovu inicijativu u Parlamentu, jer, naglašava, nije njegov posao, da se miješa u zakonodavne poslove, niti da "zaustavljam ljude da urade neke glupe stvari", Ešdaun posjeća i na sljedeće:

"Parlamentarci ne mogu naći dovoljno novca za škole, ljekare, penzije, a sebi bi uzeli toliko. Zaprepašćujuće je da donesu takvu odluku", kaže i pominje kao dobar primjer Šefika

Džaferovića, koji je, veli, jedini u Parlamentu pokazao razumnost i odbio primiti dodatak na platu.

To je, smatra Ešdaun, reakcije koja bi trebala preovladati.

“Sve ostalo će izazvati nepovjerenje u političare, koje je i onako prilično nisko. Troškovi vlade su već prevazišli mogućnosti ove zemlje, prosječni građani nemaju pristojne plate, nemaju posao, ne mogu platiti školstvo, zdravstvo, jer se tako mnogo plaća za članove parlamenta i birokratiju. Mislim da bi donošenje takvog zakona bilo skandalozno”, kaže Ešdaun i poziva parlamentarce da još jednom razmisle o donošenju ovoga zakona.

Nije u pitanju, dodaje, tek puko namicanje privilegija, već i povreda standarda kojih se zastupnici u Parlamentu moraju pridržavati.

Šansa ili tragedija?

“Bila bi tragedija za ovu zemlju ukoliko ne iskoristimo izvanredne prilike u ovoj godini. Četiri su glavna pitanja – ustroj Mostara, SIPA, stvaranje sistema obavještajne službe i jedinstvene komisije za sudstvo na razini države. Ako to do kraja februara ne uspijemo, ili ako ne napravimo bilo kakav napredak, to će biti velika katastrofa”, kaže Ešdaun.

Ešdaun podsjeća da do kraja februara pred vlastima stoje veliki zadaci – imenovanje ministra odbrane, zamjenika ministara i glavnokomandujućeg vojske.